

孔教新編

鄭孝胥述



孔教新編

孝背

孔教新編

鄭孝胥述

第一章

至聖先師孔子曰天地之性人爲
貴

統合萬物 謂之天地 萬物
之靈 皆莫如人 故天地之

間 人爲最貴 自人而外

皆萬物也 聖人人也 我亦

人也 我與聖人同類 能學

聖人 其貴何如 世俗之人

不知我之爲貴 不學聖人

自視甚賤 失其本性 名

爲小人 宗孔教者 知人之

貴則不信鬼神之禍福知
我之貴則不受天下之凌踐
苟失性而爲小人是自居
於下賤人亦從而賤之矣
外教託於敬天以警小人
至使不學之人崇事鬼神
不知人之爲貴其弊甚大

不可爲訓也

第二章

子曰見賢思齊焉見不賢而內自省也

賢者所爲 其行甚高 使我
爲之 非不能也 勉力爲之
則與之齊矣 不賢之人

其行汙下 惟不自知 是以
安之 我不自省 或與之等
矣 宗孔教者 擇善而從
不善而改 故讀書師古 不
若取鏡於當世 苟不甘於人
後 亦不同於流俗 庶可謂
豪傑之士矣

第三章

子曰君子欲訥於言而敏於行

常人之情言過於行君子

之德行過於言宗孔教者

以力行為貴不以巧言為

能故其為人也聞其言則

若不足觀其行則若有餘

是以言出而人愈信 非信其
言也 信其行之過於言也
彼無行而能言者 非孔子之
道也

第四章

子路曰願聞子之志子曰老者安
之朋友信之少者懷之

尊聖人者 求之高遠 聖人
之真 不可得見也 與人相
處 必通人情 老者所勞
朋友所疑 少者所苦 聖人
處之 淡然皆忘 達於人情
而已 宗孔教者 以此入羣
行之一身不爲狹 推之一

世不爲廣 學聖人者 求之
於此 近之可以治身家 遠
之可以平天下 所謂庸行者
此爾

第五章

子曰人之生也直罔之生也幸而
免

人之處世 智愚賢否 相資
以生 故以直爲美德 不曲
之謂直 罔則曲矣 不欺之
謂直 罔則欺矣 曲者人疑
之 欺者人絕之 行罔道之
將窮於所往 欲以自免難
哉 宗孔教者 依於禮義

直而不紱 彼飾智以驚愚
用術以疑衆者 皆聖人所不
與也 至於父子相隱 吾黨
稱直 則直之合於人情明矣

第六章

子以四教 文行忠信

文以成學 行以立品 忠以

盡職 信以存誠 四者皆備
可以爲完人矣 孔子人師
也 其教人也 教以爲人而
已 天下之人 未能盡人之
道 而用心行事 每出於日
用常行之外 舍其親切 驚
於虛無 非孔教之宗旨也

第七章

子曰知者不惑仁者不憂勇者不懼

知者仁者勇者 固有過人之
質 不惑不憂不懼 則皆可
學而能 理明則不惑 理可
積而使之明也 心安則不憂

心可正而求其安也 氣盛
則不懼 氣可養而致於盛也
賦質不齊 中人以下 於
知仁勇三德 每有不能跂及
之慨 自孔子言之 則知仁
勇者 盡人所當勉 故以爲
三達德焉

第八章

樊遲問仁子曰居處恭執事敬與人忠雖之夷狄不可棄也

放蕩恣肆者其人必不仁
不仁之德夷狄所不能堪
而況於斯民乎恭敬以忠
造次顛沛不離其身則養

其心者既密 宅於仁者益安
宗孔教者 亦惟於居處執
事與人之間 加之意而已

第九章

子貢問曰有一言而可以終身行之者乎子曰其恕乎己所不欲勿施於人

人之大惡 利己損人是也
終身除之而不盡 舉世溺之
而不知 道德之喪 種類之
殘 皆由此耳 孔子以恕爲
教 以己律人 理雖易知
誼則難至 一人行之 衆人
化之 斯宇宙之內 人道大

明 人類相愛 仇讎爭奪之
禍 可以免矣

第十章

子曰三軍可奪帥也匹夫不可奪
志也

行己則有抗節之志 愛人則
有仗義之志 志不可奪 此

人所以可貴也 三軍合之於
外 匹夫執之於內 故帥可
奪 而志難奪 聖人以立志
爲教 然必配義與道 而後
其志可觀 彼志於富貴利達
者 反喪其道義之志 則是
見奪於私欲也 可不戒哉

第十一章

子曰志士仁人無求生以害仁有
殺身以成仁

仁者人之本心也 臨難之際
苟求生而全身 生則生矣
而無一息之安 身則存矣
而抱沒世之恥 其本心不

死故也。志士仁人，或舍生而殺身，何哉？彼視害仁之痛，甚於殺身；成仁之安，過於求生。其本心不昧，故也。宗孔教者，以成仁爲極則，尙氣好名之行，殆未可同日而道矣。

第十二章

子曰君子之於天下也無適也無
莫也義之與比

是非不明於天下 道不同者

必出於爭 庸衆之人 味

然從之 天下所以亂也 君

子以義爲歸 則是非自明

執義者 君子與之 故曰無
適也 背義者 君子去之
故曰無莫也 析義必精 見
義必勇 孔教與異端 所以
不同者在此

第十三章

子曰朝聞道夕死可矣

有生之物 莫不懼死 外教
設天堂地獄之說 以警之於
死後 謂死後之狀 亦必貪
樂而畏苦 此庸愚之迷信
所以益衆也 聞道者 知物
化之理 則安常處順 死生
一體 盡於人事 而不爲世

外之虛冀 心安理得 修短
何殊 泰然以往 何所不可
哉 未生之狀 我忘之矣
宗孔教者 患不聞道 慮奚
於夕死乎

第十四章

子曰有教無類

人之言曰 非我族類 其心
必異 此爭端所由起也 聖
人設教 以化其類 中也養
不中 才也養不才 則有同
類之愛 先知覺後知 先覺
覺後覺 則無異類之殊 明
教以錫類 孔子之志也 師

孔子者 循是以求之 則異
端不能害矣

戊申之季冬爪哇各埠華僑以保全國籍於泗水埠開聯保大會。有日惹商會總理閩人郭禎祥倡立聖教公會。華僑入會者甚衆。己酉夏郭來上海求編讀本以貽小學。秋風既起爲書此編。

此編盛行於南洋各埠。癸酉正月得莊士敦先生書知英京大學以此教授。乃付重印。孝胥。

